

Federalni ministar za pitanja boraca i invalida odbrambeno-oslobodilačkog rata doc.dr. Salko Bukvarević prisustvovao je odavanju počasti poginulim pripadnicima "Crnih labudova" na Centralnom spomen-obilježju u Nedžarićima te svečanoj akademiji Udruženja boraca „Crni labudovi“ u okviru obilježavanja godišnjice osnivanja jedinice i godišnjice pogibije narodnog heroja Mehdina Hodžića – Crnog labuda.

Obilježavanje godišnjice pogibije narodnog heroja započeto je u Zaseoku, mjestu pogibije rahmetli Hodžića gdje su brojne delegacije i saborci položili cvijeće i odali počast. Ministar Bukvarević je i ove godine, kao i svih prethodnih, prisustvovao odavanju počasti u Zaseoku nakon čega je održana akademija u okviru manifestacije "Dani odbrane Sapne" u Sapni.

Ovim povodom ministar Bukvarević je kazao kako su emocije posebne jer je i sam bio pripadnik Crnih labudova. Ipak, kazao je da je ponosan na saborce jer su i u miru nastavili da organizirano djeluju i reliziraju projekte kojima će očuvati sjećanje na saborce koji su živote dali za odbranu države i svih njenih naroda.

„Crni labudovi“ su jedna od najelitnijih i najorganiziranijih jedinica Armije RBiH koja je bila prisutna na mnogim ratištima širom Bosne i Hercegovine. Hrabrost ovih momaka je ostala trajno zapisana u historiji naše domovine i na spomen-obilježjima širom naše države.

„Vrlo je važno da čuvamo i negujemo kulturu sjećanja. Naša zemlja nikada nije upamtila tako odvažnu i hrabru generaciju koja je tako voljela svoju domovinu kao tih devedesetih godina. Oni su bili najpotrebniji BiH. Mnogi naši prijatelji i saborci utkali su svoje živote u temelje jedine nam domovine da bi je sačuvali i to nikada ne smijemo zaboraviti. O tome moramo učiti nove generacije koje dolaze" kazao je, između ostalog, ministar Bukvarević. Dodao je da je rahmetli Hodžić bio "izuzetno hrabar borac koji je zajedno sa borcima išao na liniju i odatle komandovao. Svojom hrabrošću i plemenitošću ohrabrivao je sve borce ali i brinuo o svakom ponaosob. Mehdin je bio i ostao istinski heroj odbrane naše domovine kojeg narod nije zaboravio ni 27 godina nakon pogibije. Prenosio je na nas ideju da je naša jedina domovina BiH i da druge nemamo te da je naša obaveza dati sve od sebe za odbranu naše države i svih njenih naroda" zaključio je ministar Bukvarević.

Predsjednik Udruženja Avdo Subašić je govoreći o ratnom putu jedinice kazao kako su Crni labudovi bilo na skoro svim ratištima širom Bosne i Hercegovine te da nikada nisu odbili nijedan

zadatak. Svojoj organiziranošću i hrabrošću lahko su bili prepoznati gdje god bi se pojavili a narodu su ulijevali nadu i sigurnost. Subašić je zahvalio svima na njihovom naporu da svake godine budu prisutni na obilježavanju ovako značajnih datuma.

„Mi kao Udruženje nikad nećemo prestati sjećati se naših saboraca koji su dali živote za domovinu, dali dijelove tijela i njihovih porodica. To nam je trajna obaveza i amanet koji su nam ostavili naši saborci kojih više nema među nama. Udruženje postoji kako bi se sačuvalo sjećanje na ratni put ali i kako bismo u miru vodili brigu o porodicama naših saboraca koji su poginuli i umrli“.

U okviru Akademije dodijeljena su priznanja i zahvalnice zaslužnim pojedincima i organizacijama ali i institucijama. Posebno emotivan trenutak bila je dodjela najvećeg priznanja Udruženja -Povelje koju su saborci iz Crnih labudova ove godine dodijelili posthumno preminulom saborcu Zejdu Dukmeniću a preuzeli su je njegovi sinovi Isa i Jahja. Povelju su uručili predsjednik Udruženja i ministar Bukvarević. Rahmetli Zejd Dukmenić je dao izuzetan doprinos u odbrani naše države, bio je izuzetan sportista, patriota ali iznad svega ljudska gromada, kazali su njegovi saborci.

Manifestacija je završena zajedničkim iftarom za goste, saborce i članove porodica šehida i poginulih branilaca.

Kabinet ministra



„Crni labudovi“ – hrabra generacija koja je branila domovinu i sve njene narode

Autor Administrator

